

Апостол 07.12.2024

Б: Мир всем.

Я: И духови твоему.

Б: Премудрость.

Я: Прокимен, глас 3. Песнь Богородицы:

Величит душа Моя Господа, / и возрадовася дух Мой о Бозе Спасе Моем.

Хор: Величит душа Моя Господа...

Я: Яко призре на смирение Рабы Своея, се бо, отныне ублажат Мя вси роди.

Хор: Величит душа Моя Господа...

Я: Ин Прокимен, глас 4:

Я: Дивен Бог во святых Своих, Бог Израилев.

Хор: Дивен Бог во святых Своих, Бог Израилев.

Б: Премудрость.

Я: ко ефесеем послание святаго Апостола Павла чтение.

Б: Вонмем

Братие, возмогайте о Господе и в державе крепости Его, облецытеся во вся оружия Божия, яко возмощи вам стати противу кознем диавольским, яко несть наша брань к крови и плоти, но к началом и ко властем и к миродержителем тмы века сего, к духовом злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшеся в броня правды, и обувшеся нозе во

уготовление благовествования мира, над всеми же восприимше щит веры, в немже возможете вся стрелы лукаваго разжженныя угасити. И шлем спасения восприимите, и меч духовный, иже есть Глагол Божий.
*(Еф 6:10–17, зач. 233)

Братие, о да бысте мало потерпели безумию моему! Но и потерпите мя. Ревную бо по вас Божию ревностию: обручих бо вас единому мужу деу чисту представити Христови. Боюся же, да не како, якоже змий Еву прельсти лукавством своим, тако истлеют и разумы ваши от простоты, яже о Христе. Аще бо грядый инаго Иисуса проповедает, егоже не проповедахом, или Духа инаго приемлете, егоже не приясте, или благовествование ино, еже не приясте, добре бысте потерпели. Непщую бо ничимже лишитися предних Апостол. Аще бо и невежда словом, но не разумом, но везде явльшеся о всем в вас.

*(2 Кор 11:1–6, зач. 191)

Б: Мир ти.

Я: И духови твоему.

Б: Премудрость.

Я: Аллилуиа глас 8

Я: Слыши, Дщи, и виждь, и приклони ухо Твое.

Хор: Аллилуиа 3 раза

Я: Лицу Твоему помолятся богатии людстии.

Хор: Аллилуиа 3 раза

Я: Воззваша праведнии, и Господь услыша их.

Хор: Аллилуиа 3 раза